

॥ तैत्तिरीय संहिता ॥

॥ चतुर्थः प्रश्नः ॥

॥ तैत्तिरीयसंहितायां द्वितीयकाण्डे चतुर्थः प्रश्नः ॥

दे॒वा म॑नु॒ष्याः पि॒तर॒स्तेऽन्य॑त॒ आस॒न्नसु॑रा र॒ख्याऽसि॑
पि॒शाचा॒स्तेऽन्य॑त॒स्तेषां॑ दे॒वाना॑मु॒त यद॑ल्पं लोहि॑तमकु॒र्वन्त॑द्र॒क्षा
रात्री॑भिरसु॒भ्रन्ता॒न्सु॒ब्धान्मृ॑तान॒भि व्यौ॑च्छ॒त्ते दे॒वा अ॑विदु॒र्यो
वै नो॒ऽय॒मि॒न्द्रि॒यते॒ र॒ख्याऽसि॑ वा इ॒मं घ्न॑न्तीति॒ ते
र॒ख्याऽस्यु॑पा॒मत्र॑यन्त॒ तान्य॑ब्रुव॒न्वरं॑ वृ॒णाम॑है यत्॥१॥

असु॑रा॒ञ्जया॑म॒ तन्नः॑ स॒हास॑दिति॒ ततो॒ वै दे॒वा
असु॑रानजय॒न्तेऽसु॑राञ्जित्वा र॒ख्याऽस्य॑पा॒नुद॑न्त॒ तानि॒
र॒ख्याऽस्य॑नृ॒तम॑कर्तेति॒ सम॑न्तं दे॒वान्पर्य॑विश॒न्ते दे॒वा
अ॒ग्राव॑नाथन्त॒ तेऽग्न॑ये प्र॒वते॑ पुरो॒डाश॑म॒ष्टाक॑पालं
नि॒रव॑पन्न॒ग्नये॑ वि॒बाध॑वतेऽग्न॑ये प्रती॑कवते॒ यद॒ग्नये॑ प्र॒वते॑
नि॒रव॑पन् या॒न्येव॑ पुर॒स्ता॒द्र॒ख्याऽसि॑॥२॥

आस॑न्तानि॒ तेन॒ प्राणु॑दन्त॒ यद॒ग्नये॑ वि॒बाध॑वते॒ या॒न्येवा॑भितो॒
र॒ख्याऽस्या॑स॒न्तानि॒ तेन॒ व्य॑बाधन्त॒ यद॒ग्नये॑ प्रती॑कवते॒

यान्येव पश्चाद्रक्षाः स्यासन्तानि तेनापांनुदन्त ततो
 देवा अभवन्परासुरा यो भ्रातृव्यवान्स्यात्स स्पर्धमान
 एतयेष्ट्या यजेताग्नये प्रवते पुरोडाशमष्टाकपालं निर्वपेदग्नये
 विबाधवते॥ ३॥

अग्नये प्रतीकवते यदग्नये प्रवते निर्वपति य
 एवास्माच्छ्रेयाभ्रातृव्यस्तं तेन प्र णुदते यदग्नये विबाधवते
 य एवैनैन सदृङ् तेन वि बाधते यदग्नये प्रतीकवते य
 एवास्मात्पापीयान्तं तेनाप नुदते प्र श्रेयाः सम्भ्रातृव्यं
 नुदतेऽति सदृशं क्रामति नैनम्पापीयानाप्रोति य एवं
 विद्वानेतयेष्ट्या यजते॥ ४॥

वृणामहे यत्पुरस्ताद्रक्षाः सि वपेदग्नये विबाधवत एवञ्चत्वारि च॥ १॥ ————— [१]

देवासुराः संयत्ता आसन्ते देवा अब्रुवन् यो नो
 वीर्यावत्तमस्तमनुं समारभामहा इति त इन्द्रमब्रुवन्त्वं वै नो
 वीर्यावत्तमोऽसि त्वामनुं समारभामहा इति सोऽब्रवीत्तिस्रो मं
 इमास्तनुवो वीर्यावतीस्ताः प्रीणीताथासुरानभि भविष्यथेति
 ता वै ब्रूहीत्यब्रुवन्नियमं होमुगियं विमृधेयमिन्द्रियावती॥ ५॥

इत्य॑ब्रवी॒त्त इन्द्रा॑या॒ऽहोमु॑चै॒ पुरो॒डाश॑मेकादशकपालं
 निर॑वप॒न्निन्द्रा॑य वैमृ॒धायेन्द्रा॑येन्द्रि॒याव॑ते॒ यदिन्द्रा॑या॒ऽहोमु॑चै
 निर॑वप॒न्न॒ऽहं॑स ए॒व तेना॑मुच्यन्त॒ यदिन्द्रा॑य वैमृ॒धाय॒ मृध॑ ए॒व
 तेनापा॑घ्नत॒ यदिन्द्रा॑येन्द्रि॒याव॑त इन्द्रि॒यमे॒व तेना॑त्मन्न॒दध॑त॒
 त्रय॑स्त्रि॒ऽशत्क॑पालम्पुरो॒डाशं॑ निर॑वप॒न्नय॑स्त्रि॒ऽशद्वै॒ देव॑ता॒स्ता
 इन्द्र॑ आ॒त्मन्न॑नु॒ समार॑म्भयत॒ भूत्यै॑॥६॥

तां वाव दे॒वा विजि॑तिमुत्त॒माम॑सुरै॒र्व्यज॑यन्त॒ यो
 भ्रातृ॑व्यवा॒न्त्स्यात्स॑ स्पर्ध॑मान ए॒तये॑ष्ट्या॒ यजे॑तेन्द्रा॑या॒ऽहोमु॑चै
 पुरो॒डाश॑मेकादशकपालं निर॑वपे॒दिन्द्रा॑य वैमृ॒धायेन्द्रा॑येन्द्रि॒याव॑ते-
 ऽऽहं॑सा॒ वा ए॒ष गृही॑तो यस्मा॒च्छेया॑न्भ्रातृ॒व्यो यदिन्द्रा॑या॒ऽहोमु॑चै
 निर॑वप॒त्य॒ऽहं॑स ए॒व तेन॑ मुच्यते मृ॒धा वा ए॒षोऽभिष॑ण्णो॒
 यस्मा॑त्समा॒नेष्व॒न्यः श्रेया॑नुत॥७॥

अभ्रा॑तृव्यो॒ यदिन्द्रा॑य वैमृ॒धाय॒ मृध॑ ए॒व तेनाप॑
 हते॒ यदिन्द्रा॑येन्द्रि॒याव॑त इन्द्रि॒यमे॒व तेना॑त्मन्ध॒त्ते
 त्रय॑स्त्रि॒ऽशत्क॑पालम्पुरो॒डाशं॑ निर॑वपति॒ त्रय॑स्त्रि॒ऽशद्वै
 देव॑ता॒स्ता ए॒व यज॑मान आ॒त्मन्न॑नु॒ समार॑म्भयते॒ भूत्यै॑
 सा वा ए॒षा विजि॑तिर्नामेष्टि॒र्य ए॒वं वि॒द्वाने॒तये॑ष्ट्या॒ यज॑त

उत्तमामेव विजितिम्प्रातृव्येण वि जयते॥८॥

इन्द्रियावन्ती भूत्या उत्तैकान्नपञ्चाशच्च॥२॥ [२]

देवा॒सुराः संय॑त्ता आस॒न्तेषां॑ गाय॒त्र्योजो॑ बल॑मिन्द्रि॒यं
वी॒र्य॑म्प्र॒जाम्प॒शून्त्संगृ॒ह्यादाया॑प॒क्रम्या॑तिष्ठ॒त्तैऽम॒न्यन्त॑ यत॒रान्
वा इ॒यमु॑पाव॒थ्स्यति॑ त इ॒दम्भ॑विष्य॒न्तीति॑ तां व्य॑ह्वयन्त॒
विश्व॑कर्म॒न्निति॑ दे॒वा दा॑भीत्यसु॒राः सा नान्य॑तरा॒श्च
नोपा॑वर्तत॒ ते दे॒वा ए॒तद्य॑जुरपश्य॒न्नोजो॑ऽसि॒ सहो॑ऽसि॒
बल॑मसि॥९॥

भ्राजो॑ऽसि दे॒वानां॑ धाम॒ नामा॑सि॒ विश्व॑मसि
वि॒श्वायुः॑ सर्व॑मसि॒ सर्वा॑युरभि॒भूरिति॑ वाव दे॒वा
असु॑राणा॒मोजो॑ बल॑मिन्द्रि॒यं वी॒र्य॑म्प्र॒जाम्प॒शून्वृ॑ञ्जत॒
यद्गा॑य॒त्र्यप॒क्रम्या॑तिष्ठ॒त्तस्मा॑दे॒तां गा॑य॒त्रीती॑ष्टि॒माहुः॑ सं व॒थ्सरो॑
वै गा॑य॒त्री सं॑व॒थ्सरो॑ वै तद॑प॒क्रम्या॑तिष्ठ॒द्यदे॒तया॑ दे॒वा
असु॑राणा॒मोजो॑ बल॑मिन्द्रि॒यं वी॒र्य॑म्॥१०॥

प्र॒जाम्प॒शून्वृ॑ञ्जत॒ तस्मा॑दे॒ताः सं॑व॒र्ग इ॒तीष्टि॑माहु॒र्यो
भ्रातृ॑व्यवा॒न्त्स्यात्स॑ स्पर्ध॑मान ए॒तये॑ष्ट्या॑ यजे॒ताग्नये॑ संव॒र्गाय॑

पुरोडाशमष्टाकपालं निर्वपेत्त९ श्रुतमासन्नमेतेन यजुषाभि
मृशेदोज एव बलमिन्द्रियं वीर्यम्प्रजाम्पशून्भ्रातृव्यस्य वृद्धे
भवत्यात्मना परास्य भ्रातृव्यो भवति॥११॥

बलमस्येतया देवा असुराणामोजो बलमिन्द्रियं वीर्यम्पञ्चत्वारि९शच्च॥३॥ — [३]

प्रजापतिः प्रजा असृजत् ता अस्मात्सृष्टाः पराचीरायन्ता
यत्रावसन्ततो गर्मुदुदतिष्ठत्ता बृहस्पतिश्चान्ववैता९ सो-
ऽब्रवीद्बृहस्पतिरनया त्वा प्र तिष्ठान्यथ त्वा प्रजा
उपावर्त्स्यन्तीति तम्प्रातिष्ठत्ततो वै प्रजापतिम्प्रजा
उपावर्तन्त यः प्रजाकामः स्यात्तस्मा एतम्प्राजापत्यं गार्मुतं
चरुं निर्वपेत्प्रजापतिम्॥१२॥

एव स्वेन भागधेयेनोप धावति स एवास्मै प्रजाम्प्र
जनयति प्रजापतिः पशून्सृजत् तैऽस्मात्सृष्टाः पराश्च
आयन्ते यत्रावसन्ततो गर्मुदुदतिष्ठत्तान्पूषा चान्ववैता९
सोऽब्रवीत्पूषानया मा प्र तिष्ठार्थं त्वा पशवं उपावर्त्स्यन्तीति
माम्प्र तिष्ठेति सोमोऽब्रवीन्मम् वै॥१३॥

अकृष्टपच्यमित्युभौ वाम्प्र तिष्ठानीत्यब्रवीत्तौ प्रातिष्ठत्ततो
वै प्रजापतिम्पशवं उपावर्तन्त यः पशुकामः स्यात्तस्मा

ए॒त॒ꣳ सो॒मापौ॒ष्णं गा॑र्मु॒तं च॑रुं निर्व॑पेत्सोमापू॒षणा॑वे॒व स्वेन॑
भा॒ग॒धे॒येनो॑प॒ धा॒वति॑ तावे॒वास्मै॑ प॒शून्प्र॑ ज॒नय॑तः सोमो॒ वै
रे॒तो॒धाः पू॒षा प॑शूना॒म्प्र॑ज॒नयि॑ता सोमं ए॒वास्मै॑ रे॒तो द॑धाति
पू॒षा प॒शून्प्र॑ ज॒नय॑ति॥१४॥

व॒पेत्प्र॒जाप॑तिं वै द॒धाति॑ पू॒षा त्री॑णि च॥४॥ [४]

अ॒ग्ने गो॒भिर्न॒ आ गु॒हीन्द्रो॑ पु॒ष्ट्या जु॑षस्व नः। इन्द्रो॑ ध॒र्ता
गृ॒हेषु॑ नः॥ स॒वि॒ता यः स॑ह॒स्त्रियः॑ स नो॑ गृ॒हेषु॑ रा॒रणत्। आ
पू॒षा ए॒त्वा व॑सु॥ धा॒ता द॑दातु नो र॒यिमी॑शा॒नो ज॑ग॒त॒स्पतिः॑।
स नः॑ पू॒र्णेन॑ वा॒वन॑त्॥ त्वष्टा॒ यो वृ॑ष॒भो वृ॑षा स नो॑ गृ॒हेषु॑
रा॒रणत्। स॒ह॒स्रे॑णा॒युते॑न च॥ येन॑ दे॒वा अ॒मृत॑म्॥१५॥

दी॒र्घ॒ꣳ श्रवो॑ दि॒व्यैर॑यन्त। रा॒य॑स्पोष॒ त्वम॑स्मभ्यं ग॒वां
कु॒ल्मिं जी॒वस॒ आ यु॑वस्व। अ॒ग्निर्गृ॑हप॒तिः सोमो॑ वि॒श्वव॑निः
स॒वि॒ता सु॑मे॒धाः स्वाहा॑। अ॒ग्ने गृ॑हप॒ते य॑स्ते घृ॒त्यो भा॑ग॒स्तेन॑
सह॑ ओज॑ आ॒क्रम॑मा॒णाय॑ धेहि॒ श्रेष्ठ्या॑त्प॒थो मा योषं॑ मूर्धा
भू॒यास॒ꣳ स्वाहा॑॥१६॥

अ॒मृत॑म॒ष्टात्रि॑ꣳशच्च॥५॥ [५]

चि॒त्रया॑ य॒जेत॑ प॒शुका॑म इ॒यं वै चि॒त्रा य॒द्वा अ॒स्यां

विश्वम्भूतमधि प्रजायते तेनेयं चित्रा य एवं विद्वांश्चित्रया
 पशुकामो यजते प्र प्रजया पशुभिर्मिथुनैर्जायते प्रैवाग्नेयेन
 वापयति रेतः सौम्येन दधाति रेत एव हितं त्वष्टा
 रूपाणि वि करोति सारस्वतौ भवत एतद्वै दैव्यमिथुनं
 दैव्यमेवास्मै॥१७॥

मिथुनमध्यतो दधाति पुष्ट्यै प्रजननाय सिनीवाल्थ्यै
 चरुर्भवति वाग्वै सिनीवाली पुष्टिः खलु वै वाक्पुष्टिमेव
 वाचमुपैत्यैन्द्र उत्तमो भवति तेनैव तन्मिथुनं सप्तैतानि
 हवींषि भवन्ति सप्त ग्राम्याः पशवः सप्तारण्याः सप्त
 छन्दांस्युभयस्यावरुद्धा अथैता आहुतीर्जुहोत्येते वै देवाः
 पुष्टिपतयस्त एवास्मिन्पुष्टिं दधति पुष्यति प्रजया पशुभिरथो
 यदेता आहुतीर्जुहोति प्रतिष्ठित्यै॥१८॥

अस्मै त एव द्वादश च॥६॥ [६]

मारुतमसि मरुतामोजोऽपां धारां भिन्द्धि रमयंत
 मरुतः श्येनमायिनम्मनोजवसं वृषणं सुवृक्तिम् येन
 शर्ध उग्रमवसृष्टमेति तदश्विना परि धत्तं स्वस्ति।
 पुरोवातो वर्षाञ्जिन्वरावृथ्स्वाहा वातावद्वर्षन्नुग्रावृथ्स्वाहा

स्तनयन्वर्षन्भीमरावृथ्स्वाहानशन्यवस्फूर्जन्दिद्युद्वर्षन्त्वेषरावृथ्
वर्षन्पूर्तिरावृत् ॥ १९ ॥

स्वाहा बहु हायमवृषादिति श्रुतरावृथ्स्वाहातपति
वर्षन्विराडावृथ्स्वाहावस्फूर्जन्दिद्युद्वर्षन्भूतरावृथ्स्वाहा
मान्दा वाशाः शुन्ध्यूरजिराः। ज्योतिष्मतीस्तमस्वरीरुन्दतीः
सुफेनाः। मित्रंभृतः र्व्वत्रंभृतः सुराष्ट्रा इह माऽवत। वृष्णो
अश्वस्य सुदानमसि वृष्ट्यै त्वोप नह्यामि ॥ २० ॥

पूर्तिरावृद्धिचत्वारिंशच्च ॥ ७ ॥ ————— [७]

देवा वसव्या अग्ने सोम सूर्य। देवाः शर्मण्या
मित्रावरुणार्यमन्त्र। देवाः सपीतयोऽपा नपादाशुहेमन्त्र। उद्रो
दत्तोऽदधिम्भिन्त दिवः पर्जन्यादन्तरिख्यात्पृथिव्यास्ततो
नो वृष्ट्याऽवत। दिवा चित्तमः कृण्वन्ति पर्जन्येनोदवाहेन।
पृथिवीं यद्व्युन्दन्ति। आ यं नरः सुदानवो ददाशुषे दिवः
कोशमचुच्यवुः। वि पर्जन्याः सृजन्ति रोदसी अनु धन्वना
यन्ति ॥ २१ ॥

वृष्टयः। उदीरयथा मरुतः समुद्रतो यूयं वृष्टिं वर्षयथा
पुरीषिणः। न वो दस्त्रा उप दस्यन्ति धेनवः शुभं यातामनु रथा

अवृत्सत। सृजा वृष्टिं दिव आद्भिः समुद्रम्पृण। अञ्जा अंसि
 प्रथमजा बलमसि समुद्रियम्। उन्नम्भय पृथिवीम्भिन्द्धीदं
 दिव्यं नभः। उद्रो दिव्यस्य नो देहीशानो वि सृजा दृतिम्।
 ये देवा दिविभागा येऽन्तरिख्यभागा ये पृथिविभागाः। त
 इमं यज्ञमवन्तु त इदं ख्येत्रमा विशन्तु त इदं ख्येत्रमनु वि
 विशन्तु॥२२॥

यन्ति देवा विशन्ति॥८॥ [८]

मारुतमसि मरुतामोज इति कृष्णं वासः कृष्णतूषम्परि
 धत्त एतद्वै वृष्ट्यै रूपं सरूप एव भूत्वा पर्जन्यं वर्षयति
 रमयत मरुतः श्येनमायिनमिति पश्चाद्वातम्प्रति मीवति
 पुरोवातमेव जनयति वर्षस्यावरुद्धौ वातनामानि जुहोति
 वायुर्वै वृष्ट्या ईशे वायुमेव स्वेन भागधेयेनोप धावति स
 एवास्मै पर्जन्यं वर्षयत्यष्टौ॥२३॥

जुहोति चतस्रो वै दिशश्चतस्रोऽवान्तरदिशा दिग्भ्य
 एव वृष्टिं सम्प्र च्यावयति कृष्णाजिने सं यौति
 हविरेवाकर्न्तर्वेदि सं यौत्यवरुद्धौ यतीनामद्यमानानां
 शीर्षाणि परापतन्ते खर्जूरा अभवन्तेषां रस ऊर्ध्वो-

ऽप॒त॒त्तानि॑ क॒रीरा॑ण्यभवन्सौ॒म्यानि॑ वै क॒रीरा॑णि सौ॒म्या
खलु॑ वा आ॒हु॒तिर्दि॒वो वृष्टिं॑ च्यावयति॒ यत्क॒रीरा॑णि
भव॑न्ति॥ २४॥

सौ॒म्ययै॒वाहु॑त्या दि॒वो वृष्टि॑मव॒ रुन्दे॒ मधु॑षा॒ सं यौ॑त्य॒पां
वा ए॒ष ओष॑धीना॒ रसो॑ यन्मध्व॒द्वा ए॒वौष॑धीभ्यो व॒र्षत्य॑थो
अ॒द्वा ए॒वौष॑धीभ्यो वृष्टिं॑ नि न॑यति॒ मान्दा॒ वाशा॒ इति॑ सं
यौ॑ति॒ नाम॒धेयै॑रे॒वैना॒ अ॒च्छैत्य॑थो यथा॑ ब्रूयादसा॒वेही॒त्येव॑मे॒वैना॑
नाम॒धेयै॑रा॥ २५॥

च्याव॒यति॑ वृ॒ष्णो अ॒श्वस्य॑ सं॒दान॑मसि॒ वृष्ट्यै॑ त्वोप॑
न॒ह्यामी॒त्याह॑ वृ॒षा वा अ॒श्वो वृ॒षा प॒र्जन्यः॑ कृ॒ष्ण इ॒व खलु॑ वै
भू॒त्वा व॑र्षति॒ रूपे॑णै॒वैन॑ र्म॒र्धय॑ति व॒र्षस्याव॑रु॒द्धौ॥ २६॥

अष्टौ भवन्ति नामधेयैरेकात्रिंशच्च॥१॥

[१]

देवा॑ वस॒व्या देवाः॑ श॒र्मण्या॒ देवाः॑ स॒पीत॑य॒ इत्या
ब॑ध्नाति॒ देव॑ता॒भिरे॒वान्व॑हं वृष्टि॑मिच्छति॒ यदि॑ व॒र्षेत्ताव॑त्ये॒व
हो॑त॒व्यं यदि॑ न व॒र्षेच्छ्वो॑ भू॒ते ह॒विर्निर्व॑पेद॒होरा॒त्रे वै
मि॒त्रावरु॑णाव॒होरा॒त्राभ्यां॑ खलु॑ वै प॒र्जन्यो॑ व॒र्षति॒ नक्तं॑ वा
हि दि॒वा वा व॑र्षति॒ मि॒त्रावरु॑णावे॒व स्वेन॑ भा॒गधे॑ये॒नोप॑

धावति तावेवास्मै॥२७॥

अ॒हो॒रा॒त्राभ्यां॑ प॒र्जन्यं॑ व॒र्षय॑तोऽ॒ग्नये॑ धाम॒च्छदे॑
पु॒रोडा॑शम॒ष्टाक॑पालं निर्व॑पेन्मा॒रुत॑ꣳ स॒प्तक॑पालꣳ
सौ॒र्यमे॑क॒कपाल॑म॒ग्निर्वा इ॒तो वृ॑ष्टिमुदी॒रय॑ति म॒रुतः॑
सृ॒ष्टां न॑यन्ति य॒दा खलु॑ वा अ॒सावा॑दित्यो न्य॒ङ्ग॒श्मिभिः॑
पर्या॑वर्त॒तेऽथ॑ व॒र्षति॑ धाम॒च्छदि॒व खलु॑ वै भू॒त्वा व॑र्षत्ये॒ता
वै दे॒वता॑ वृ॒ष्ट्या ई॑शते॒ ता ए॒व स्वेन॑ भा॒ग॒धेये॒नोप॑ धावति
ताः॥२८॥

ए॒वास्मै॑ प॒र्जन्यं॑ व॒र्षय॑न्त्यु॒ताव॑र्षिष्यन्व॒र्षत्ये॒व
सृ॒जा वृ॑ष्टिं दि॒व आ॒द्भिः स॑मु॒द्रम्पृ॑णेत्याहे॒माश्चै॒वामू॒श्चापः॑
सम॑र्धयत्यथो॒ आ॒भिरे॒वामू॒रच्छै॑त्य॒जा अ॑सि प्रथम॒जा बल॑म॒सि
समु॒द्रिय॑मित्या॒ह यथा॑य॒जुरे॒वैतदु॒न्न॑म्भय पृथि॒वीमि॑ति व॒र्षा॒ह्वां
जु॒होत्ये॒षा वा ओष॑धीनां वृ॒ष्टि॒वनि॑स्तयै॒व वृ॑ष्टि॒मा च्या॑वयति
ये दे॒वा दि॒विभा॑गा इति॑ कृ॒ष्णाजि॑नम॒व धू॒नोती॑म ए॒वास्मै॑
लो॒काः प्री॒ता अ॒भीष्टा॑ भवन्ति॥२९॥

अ॒स्मै धा॒वति॑ ता वा एक॑विंशतिश्च॥१०॥ [१०]

सर्वा॑णि छ॒न्दाꣳ स्ये॒तस्या॒मि॒ष्ट्याम॑नू॒च्यानी॑त्या॒हुस्त्रि॒ष्टुभो॑ वा

ए॒तद्दी॒र्यं यत्क॒कुदु॒ष्णिहा॒ जग॑त्यै॒ यदु॑ष्णिह॒ककु॑भाव॒न्वाह॒ तेनै॒व
 सर्वा॑णि॒ छन्दा॑ꣳस्य॒व रु॒द्धे गा॒यत्री॒ वा ए॒षा यदु॑ष्णिहा॒ यानि॑
 च॒त्वार्य॑ध्य॒खरा॑णि॒ चतु॑ष्पाद ए॒व ते प॒शवो॑ यथा॑ पुरो॒डाशे॑
 पुरो॒डाशोऽध्ये॒वमे॒व तद्य॑दृ॒च्यध्य॒खरा॑णि॒ यज्जग॑त्या॥ ३० ॥

परि॒द॒ध्याद॑न्तं॒ यज्ञं॑ ग॒मये॑त्रि॒ष्टुभा॒ परि॑ दधातीन्द्रि॒यं वै
 वी॒र्यं॑ त्रि॒ष्टुगि॑न्द्रि॒य ए॒व वी॒र्यं॑ य॒ज्ञम्प्र॑ति॒ ष्ठाप॑यति॒ नान्तं॑
 गम॑यत्य॒ग्ने त्री॑ ते॒ वाजि॑ना॒ त्री ष॑ध॒स्थेति॒ त्रिव॑त्या॒ परि॑ दधाति
 सरू॑प॒त्वाय॒ सर्वो॑ वा ए॒ष य॒ज्ञो यत्रै॑धा॒तवी॒यङ्कामा॑य॒कामा॑य॒
 प्र यु॑ज्यते॒ सर्वे॑भ्यो॒ हि कामे॑भ्यो॒ यज्ञः॑ प्र॒युज्य॑ते॒ त्रैधा॑त॒वीये॑न
 यजे॑ताभि॒चर॑न्त्सर्वो॒ वै॥ ३१ ॥

ए॒ष य॒ज्ञो यत्रै॑धा॒तवी॒यꣳ सर्वे॑णै॒वैनं॑ य॒ज्ञेना॒भि च॑रति
 स्तृणु॑त ए॒वैनं॑मे॒तयै॒व य॑जेताभि॒चर्य॑माणः॒ सर्वो॑ वा ए॒ष य॒ज्ञो
 यत्रै॑धा॒तवी॒यꣳ सर्वे॑णै॒व य॒ज्ञेन॑ यजते॒ नैनं॑मभि॒चर॑न्त्स्तृणु॑त
 ए॒तयै॒व य॑जेत॒ सह॑स्रेण॒ यक्ष्य॑माणः॒ प्रजा॑तमे॒वैनं॑ ह॒दात्ये॒तयै॒व
 य॑जेत॒ सह॑स्रेणै॒जानो॑ऽन्तं॒ वा ए॒ष प॑शूनां गच्छति॥ ३२ ॥

यः स॒हस्रे॑ण॒ यज॑ते॒ प्रजा॑प॒तिः खलु॑ वै प॒शून॑सृज॒त

ता९ स्त्रैधातुवीयेनैवासृजत य एवं विद्वा९स्त्रैधातुवीयेन
 पशुकामो यजते यस्मादेव योनेः प्रजापतिः पशूनसृजत
 तस्मादेवैनान्सृजत उपैनमुत्तर९ सहस्रं नमति देवताभ्यो
 वा एष आ वृश्च्यते यो यक्ष्य इत्युक्त्वा न यजते त्रैधातुवीयेन
 यजेत सर्वो वा एष यज्ञः॥३३॥

यत्रैधातुवीय९ सर्वेणैव यज्ञेन यजते न देवताभ्य
 आ वृश्च्यते द्वादशकपालः पुरोडाशो भवति ते
 त्रयश्चतुष्कपालास्त्रिष्वमृद्धत्वाय त्रयः पुरोडाशा भवन्ति
 त्रय इमे लोका एषां लोकानामास्या उत्तरउत्तरो
 ज्यायान्भवत्येवमिव हीमे लोका यवमयो मध्य एतद्वा
 अन्तरिख्यस्य रूप९ समृद्धौ सर्वेषामभिगमयन्नव
 द्यत्यछम्बद्वार९ हिरण्यं ददाति तेज एव॥३४॥

अव रुद्धे तार्प्यं ददाति पशूनेवाव रुद्धे धेनुं
 ददात्याशिष एवाव रुद्धे साम्नो वा एष वर्णो यद्धिरण्यं
 यजुषां तार्प्यमुक्थामदानां धेनुरेतानेव सर्वान् वर्णानव
 रुद्धे॥३५॥

त्वष्टा॑ ह॒तपु॑त्रो॒ वीन्द्र॑ꣳ सोम॑माह॒रत्तस्मि॒न्निन्द्र॑
 उप॒हव॑मैच्छ॒त तं॑ नोपा॑ह्वय॒त पु॒त्रस्मै॑ऽवधी॒रिति॑ स
 य॑ज्ञवेश॒सं कृ॒त्वा प्रा॒सहा सोम॑मपिब॒त्तस्य॑ यद॒त्यशि॑ष्य॒त
 तत्त्वष्टा॑हव॒नीय॑मुप॒ प्राव॑र्तय॒त्स्वाहेन्द्र॑शत्रुर्व॒र्धस्वेति॑ स
 याव॑दूर्ध्वः प॒रावि॑ध्यति॒ ताव॑ति स्व॒यमे॒व व्य॑रम॒त यदि॑ वा
 ताव॑त्प्रवृ॒णम्॥ ३६॥

आसी॑द्यदि॒ वा ताव॑दध्य॒ग्नेरासी॑त्स स॒म्भवं॑न्न॒ग्नीषोमा॑व॒भि
 सम॑भव॒त्स इ॑षुमा॒त्रमि॑षुमा॒त्रं विष्व॑ङ्ङुव॒र्धत॑ स इ॒माल्लो॑कान॒वृणो॑द्य
 वृ॒त्रत्व॑न्तस्मा॒दिन्द्रो॑ऽबिभेदपि॒ त्वष्टा॑ तस्मै॒ त्वष्टा॑
 वज्र॑मसिञ्च॒त्तपो॒ वै स वज्र॑ आसी॒त्तमुद्य॑न्तुं नाश॑क्रो॒दथ॒ वै
 तर्हि॑ विष्णुः॥ ३७॥

अ॒न्या दे॒वता॑सी॒त्सोऽब्र॑वीद्विष्ण॒वेही॑दमा ह॒रिष्या॑वो
 येना॒यमि॑दमि॒ति स विष्णु॑स्त्रे॒धात्मानं॑ वि न्य॑धत्त पृथि॒व्यां
 तृती॑यम॒न्तरि॑ख्ये तृती॑यं दि॒वि तृती॑यमभिपर्याव॒र्ताद्बि॑भेद्यत्पृथि॒
 तृती॑यमासी॒त्तेनेन्द्रो॑ वज्र॑मुद॒यच्छ॑द्विष्ण॒वंनु॑स्थितः सोऽब्र॑वीन्मा
 मे प्र॒ हार॑स्ति॒ वा इ॒दम्॥ ३८॥

मयि॑ वी॒र्यं॑ तत्ते॒ प्र दा॑स्यामीति॒ तद॑स्मै प्राय॑च्छ॒त्तत्प्रत्य॑गृह्णा॒दथ॑

मेति॒ तद्विष्ण॑वेति॒ प्राय॑च्छु॒त्तद्विष्णुः॑ प्रत्य॑गृह्णाद॒स्मास्विन्द्रं॑
 इन्द्रि॒यं द॑धा॒त्विति॒ यदन्तरि॑ख्ये॒ तृती॑यमासी॒त्तेनेन्द्रो॑
 वज्र॑मुद॒यच्छ॑द्विष्ण॒वंनु॑स्थितः॒ सोऽब्र॑वीन्मा मे॒ प्र हा॑रस्ति॒ वा
 इ॒दम्॥ ३९॥

मयि॑ वी॒र्यं त॑त्ते॒ प्र दा॑स्यामीति॒ तद॑स्मै प्राय॑च्छु॒त्तप्रत्य॑गृह्णाद्विष्णुः॑
 इति॒ तद्विष्ण॑वेति॒ प्राय॑च्छु॒त्तद्विष्णुः॑ प्रत्य॑गृह्णाद॒स्मास्विन्द्रं॑
 इन्द्रि॒यं द॑धा॒त्विति॒ यद्वि॒वि तृती॑यमासी॒त्तेनेन्द्रो॑ वज्र॑मुद॒यच्छ॑द्विष्णुः॑
 सोऽब्र॑वीन्मा मे॒ प्र हा॑र्येनाहम्॥ ४०॥

इ॒दमस्मि॒ तत्ते॒ प्र दा॑स्यामीति॒ त्वी (३) इत्य॑ब्रवीत्सन्धान्तु
 सं द॑धावहै॒ त्वामे॒व प्र वि॑शा॒नीति॒ यन्माम्प्र॑विशेः किम्मा॑ भु॒ञ्ज्या॑
 इत्य॑ब्रवी॒त्वामे॒वेन्धी॑य॒ तव॒ भो॒गाय॒ त्वाम्प्र॑ वि॒शेय॑मित्य॒ब्रवी॑त्तं
 वृ॒त्रः प्रा॑वि॒शदु॑दरं॒ वै वृ॒त्रः ख्यु॑त्खलु॒ वै म॑नु॒ष्यस्य॒ भ्रातृ॑व्यो॒
 यः॥ ४१॥

ए॒वं वेद॑ हन्ति॒ ख्यु॑ध॒म्भ्रातृ॑व्यन्तद॑स्मै प्राय॑च्छु॒त्तप्रत्य॑गृह्णा॒त्रिमं॑
 इति॒ तद्विष्ण॑वेति॒ प्राय॑च्छु॒त्तद्विष्णुः॑ प्रत्य॑गृह्णाद॒स्मास्विन्द्रं॑
 इन्द्रि॒यं द॑धा॒त्विति॒ यत्रिः॑ प्राय॑च्छु॒त्रिः प्रत्य॑गृह्णा॒त्तत्रि॑धातो॑स्त्रिधातु॑
 यद्विष्णु॑र॒न्वति॑ष्ठत् विष्ण॑वेति॒ प्राय॑च्छु॒त्तस्मा॑दैन्द्रावैष्ण॒वः॑

ह॒विर्भव॑ति॒ यद्वा इ॒दं किं च॒ तद॑स्मै॒ तत्प्राय॑च्छु॒दृचः॑ सामा॑नि॒
यजू॑षि॒ सह॑स्रं॒ वा अ॑स्मै॒ तत्प्राय॑च्छु॒त्तस्मा॑त्स॒हस्र॑द॒खिणम्॥ ४२ ॥

प्र॒वृणं॑ विष्णु॒र्वा इ॒दमि॒दम॑हं॒ यो भ॑व॒त्येक॑विं॒शतिश्च॑॥ 12 ॥ [१२]

दे॒वा वै रा॑ज॒न्याञ्जा॑य॒माना॑द॒बिभ॑यु॒स्तम॑न्त॒रेव॑ सन्तं॒
दा॒म्रापो॑म्भ॒न्त्स वा ए॒षोऽपो॑ब्धो जाय॑ते॒ यद्रा॑ज॒न्यो यद्वा ए॒षो-
ऽन॑पोब्धो जाय॑ेत॒ वृत्रा॑न्ध्र॒श्चरे॑द्यं॒ काम॑ये॒त रा॑ज॒न्यम॑न॒पोब्धो
जा॑येत॒ वृत्रा॑न्ध्र॒श्चरे॑दिति॒ तस्मा॑ ए॒तमै॑न्द्रा॒बाह॑स्प॒त्यं
च॒रुं निर्व॑पे॒दैन्द्रो॑ वै रा॑ज॒न्यो ब्र॑ह्म॒ बृह॑स्पति॒र्ब्रह्म॑णै॒वैनं॑
दा॒म्रोऽपो॑म्भ॒नान्मु॑ञ्चति॒ हिर॑ण्म॒यं दाम् द॑खि॒णा सा॑ख्यादे॒वैनं॑
दा॒म्रोऽपो॑म्भ॒नान्मु॑ञ्चति॥ ४३ ॥

ए॒न॒द्वाद॑श॒ च॑॥ 13 ॥ [१३]

न॒वो॑न॒वो भ॑वति॒ जाय॑मा॒नोऽह्ना॑ के॒तुरु॑षसा॒मेत्य॑ग्रे॑।
भा॒गं दे॒वेभ्यो॑ वि द॑धा॒त्याय॑न्त्र॒ चन्द्र॑मा॒स्तिर॑ति दी॒र्घमा॑युः।
यमा॑दि॒त्या अ॒शुमा॑प्या॒यय॑न्ति॒ यम॑खि॒तम॑खि॒तयः॑
पि॒बन्ति॑। तेन॑ नो॒ राजा॑ वरु॒णो बृ॑ह॒स्पति॑रा प्या॒यय॑न्तु॒
भुव॑नस्य गो॒पाः। प्रा॒च्या दि॒शि त्वमि॑न्द्रा॒सि रा॒जो॒तोदी॑च्यां
वृ॒त्रह॑न्वृ॒त्रहा॑सि। यत्र॒ यन्ति॑ स्रो॒त्यास्त॑त्॥ ४४ ॥

जितं ते दखिणतो वृषभ एधि हव्यः। इन्द्रो जयाति
 न परा जयाता अधिराजो राजसु राजयाति। विश्वा हि
 भूयाः पृतना अभिष्टीरुपसद्यो नमस्यो यथासत्। अस्येदेव
 प्र रिरिचे महित्वं दिवः पृथिव्याः पर्यन्तरिख्यात्। स्वराडिन्द्रो
 दम आ विश्वगूर्तः स्वरिरमत्रो ववख्ये रणाय। अभि त्वा शूर
 नोनुमोऽदुग्धा इव धेनवः। ईशानम्॥४५॥

अस्य जगतः सुवर्दशमीशानमिन्द्र तस्थुषः। त्वामिद्धि
 हवामहे साता वाजस्य कारवः। त्वां वृत्रेष्विन्द्र सत्पतिं
 नरस्त्वां काष्ठास्वर्वतः। यद्वाव इन्द्र ते शत९ शतम्भूमीरुत
 स्युः। न त्वां वज्रिन्सहस्र९ सूर्या अनु न जातमष्ट रोदसी।
 पिबा सोममिन्द्र मन्दतु त्वा यं ते सुषाव हर्यश्वाद्रिः॥४६॥

सोतुर्बाहुभ्या९ सुयतो नार्वा। रेवतीर्नः सधमाद
 इन्द्रे सन्तु तुविवाजाः। ख्युमन्तो याभिर्मदेम। उदग्ने
 शुचयस्तव वि ज्योतिषोदु त्यं जातवेदस९ सप्त त्वां
 हरितो रथे वहन्ति देव सूर्य। शोचिष्केशं विचख्यण। चित्रं
 देवानामुदगादनीकं चख्युर्मित्रस्य वरुणस्याग्नेः। आप्रा
 द्यावापृथिवी अन्तरिख्य९ सूर्य आत्मा जगतस्तस्थुषः॥४७॥

च। विश्वे देवा ऋतावृधं ऋतुभिर्हवनश्रुतः। जुषन्तां
 युज्यम्पयः। विश्वे देवाः शृणुतेमं हवम्मे ये अन्तरिख्ये
 य उप द्यवि ष्ट। ये अग्निजिह्वा उत वा यजत्रा
 आसद्यास्मिन्बर्हिषि मादयध्वम्॥४८॥

तदीशानमद्रिस्तथुषस्त्रिंशच्च॥१४॥ [१४]

विश्वरूपस्त्वष्ट्रेन्द्रं वृत्रम्रह्मवादिनः स त्वे नासौमयाज्येष वै देवर्थो देवा वै नर्चि
 नायज्ञोऽग्नें महान्निर्वीतमायुष्टे द्वादश॥१२॥ विश्वरूपो नैनं शीतरूरावद्य वसुं पूर्वद्युर्वाजा
 इत्यग्नें महान्निर्वीतमन्या यन्ति चतुःसप्ततिः॥१४॥ विश्वरूपोऽनु ते दायि॥ [१५]